

दिनांक : 24.02.2026

समय : 18.45 बजे

- केन्द्रीय मंत्रिमण्डल सेवा तीर्थ परिसर मांय व्ही पहली मीटिंग मांय राज ने नागरिक केन्द्रित बणावणो तैय कीनों
- राष्ट्रीय राजधानी हलका मांय सड़कां माथे उड़तो धूळो कम करण सारू नई दिल्ली मांय करार माथे सही करी ज्यीं
- गृह राज्य मंत्री जवाहर सिंह बेढ़म विधानसभा मांय बतायो- सरकार गैंगस्टरां माथे लगाम लगावण सारू सगळा जरूरी जतन कर रही हैं
- महाराणा प्रताप टूरिस्ट सर्किट सारू 275 करोड़ 68 लाख रुपया री परियोजना रपट तैयारं

000

केंद्रीय मंत्रिमंडल सेवा तीर्थ परिसर मांय व्ही पहली मीटिंग मांय राज ने नागरिक केंद्रित बणावण रो संकल्प कीनों सूचना अर प्रसारण मंत्री अश्विनी वैष्णव आ जाणकारी दीनीं वे बतायो के मीटिंग मांय पास करी ज्या सेवा संकल्प प्रस्ताव मांय साल 2047 ताई भारत ने खुद ने पाण ऊबो करण रो लक्ष्य राख्ही ज्यो

.....

श्री वैष्णव बतायो के मंत्रिमंडल सगळा फ़ैसला जनता री सेवा रा भाव ऊं करणो ई तैय कीनों ई सागे ई मंत्रिमंडल साल 2026-27 सारू टीडी-3 ग्रेड रा काचा जूट रो सरकारी मोल 5 हजार 925 रुपया प्रति क्विंटल तैय कीनों

000

राष्ट्रीय राजधानी हलका मांय धूळो कम करण सारू केंद्रीय पर्यावरण मंत्री भूपेंद्र यादव री मौजूदगी मांय राजस्थान, हरियाणा, उत्तर प्रदेश अर दिल्ली रा संबंधित महकमा केंद्रीय सड़क अनुसंधान संस्थान अर स्कूल ऑफ प्लानिंग एंड आर्किटेक्चर सागे करार कीनों ई रे ज़रिए सड़कां री कोर माथे हरियाली बधावण अर सड़कां रा रखरखाव रा काम और बेहतर बणावण री कोशिश करी जावेलां मीटिंग मांय श्री यादव कह्यो के दिल्ली-एनसीआर मांय वायु प्रदूषण चुनौती बण्योड़ो हैं श्री यादव ई पहल रा सामाजिक असर री ठा करण सारू कार्य बल बणावण अर बत्ती आवण जावण वाळी सड़कां री वैज्ञानिक आधार ऊं मैपिंग करावण रा हुकम दीनां

000

प्रधानमंत्री नरेंद्र मोदी रा प्रस्तावित अजमेर दौरा री तैयारियां रो जायजो लेवण सारू मुख्यमंत्री भजन लाल शर्मा आज कायड़ विश्राम स्थली रो दौरा कीनों मुख्यमंत्री सभा री ठौड़ मंच, डोम अर हिफाजती बन्दोबस्त रो बारीकी ऊं जायजो लीनों वे अहलकारां ने सगळी तैयारियां 27 फरवरी ताई पूरी कर लेवण रा हुकम दीनां श्री शर्मा कार्यकर्तावां सागे ई बातचीत कीनीं ध्यानजोग है के प्रधानमंत्री रो 28 फरवरी ने अजमेर मांय जनसभा ने सम्बोधित कर र प्रदेश ने साढे 23 हजार करोड़ रुपया ऊं बत्ता खर्च री विकास परियोजनावां रो तोहफो देवण रो कार्यक्रम हैं

000

राज्यपाल हरिभाऊ बागड़े लैक्रोज खेल ने जनजातीय क्षेत्र विकास विभाग रे मार्फत बधावो देवण सारू कह्यो हैं राज्यपाल आज वां सागे मुलाकात करण सारू पूग्या लैक्रोज खिलाडियां सागे बातचीत रे दौरान बोल रह्या हां इस दौरान श्री बागड़े खिलाडियां ने साल 2028 मांय व्हेवण वाळा ओलंपिक खेलां अर चीन मांय व्हेवण वाळा होड़ री तैयारी करण सारू कह्यो राज्यपाल खिलाडियां ऊं खेल सागे भणार्ई-लिखाई माथे ई ध्यान देवण बाबत् कह्यो

000

शिव ऊं निर्दलीय विधायक रवींद्र सिंह भाटी आज विधानसभा मांय शून्यकाल रे दौरान प्रदेश मांय 'डिब्बा कॉलिंग' अर इंटरनेट रे ज़रिये दी जा रही धमकियां रो मुद्दो उठायो वे संगठित अपराध रा तंत्र ने टेमसर खत्म नी करण री सूरत मांय प्रदेश री शांति-व्यवस्था ने खतरो व्हेवण सारू चेतायो भाटी जेलां मांय बंद अपराधियां अर परदेश मांय बैट्योड़ा गैंगस्टरां कानी ऊं राज्य मांय वां रो नेटवर्क चलावण रो आरोप माण्ड्यो शिव रा विधायक कह्यो के इंटरनेट अर डिब्बा कॉलिंग रे ज़रिए नामी

कारोबारियां ऊँले र सामान्य दुकानदारां ताई सगळां ने धमकियां दी जा रही हैं जवाब मांय गृह राज्य मंत्री जवाहर सिंह बेढम कह्यो के सरकार गैंगस्टरां माथे लगाम लगावण सारू लगातार जतन कर रही हैं वे बतायो के एंटी गैंगस्टर टास्क फोर्स अपराध करण री शंका वाळा लोगां रे खिलाफ लगातार कार्रवाई कर रही हैं श्री बेढम बतायो के परदेश मांय रह रह्या अपराधियां ने पाछा लावण सारू ई सरकार लगातार कोशिश कर रही है अर इटली अर अमेरिका ऊँ गिरफ्तारियां करी ज्यी हैं गृह राज्य मंत्री कह्यो के पुलिस अपराधियां रा नेटवर्क ने खत्म करण सारू राज्य मांय वां रा ठिकाणां माथे दबिश दे रही हैं

000

राज्य सरकार महाराणा प्रताप टूरिस्ट सर्किट सारू 275 करोड़ 68 लाख रुपया रा खर्च वाळी परियोजना रपट बणायी हैं उप मुख्यमंत्री दीया कुमारी आज विधानसभा मांय आ जाणकारी दीनीं वे बतायो के राजस्थान धरोहर प्राधिकरण री समीक्षा समिति इण री मंजूरी दे दीनीं हैं ई सर्किट मांय चावण्ड, हल्दीघाटी, गोगुन्दा, कुम्भलगढ़, दिवेर अर उदयपुर ने शामिल करी ज्यी हैं दीया कुमारी बतायो ई योजनां ऊँ हलका रा गाइड, होटल, हस्तशिल्प और होमस्टे ऊँ जुड्या लोगां सारू नौकरी-धंधा रा मौका बधेलां

000

संस्कृति अर पर्यटन मंत्री गजेंद्र सिंह शेखावत कह्यो है के सैर-सपाटो संस्कृति अर भेळी इंसानी उम्मीदां रो उत्सव हैं वे नई दिल्ली मांय राख्यी ज्यी यूएस-इंडिया स्ट्रेटेजिक पार्टनरशिप फोरम-टूरिज्म लीडरशिप समिट मांय बोल रह्या हां श्री शेखावत कह्यो के भारत दुनिया री अगाडी माली व्यवस्था बन रह्यो है अर सैर सपाटो इण रो केन्द्र बण्योडो हैं पर्यटन मंत्री कह्यो के देश रो पर्यटन तंत्र शहरी अर गांवांई हलकां मांय काम-धंधा रो जरियो हैं

000

मुख्य निर्वाचन आयुक्त ज्ञानेश कुमार सही वोटर लिस्टां माथे जोर देता थकां कह्यो है के अ लिस्टां लोकतंत्र री बुनियाद व्हे हैं श्री कुमार आज नई दिल्ली मांय निर्वाचन आयोग अर राज्यां रा चुनाव आयुक्तां रा राष्ट्रीय गोलमेज सम्मेलन मांय बोल रह्या हां मुख्य निर्वाचन आयुक्त कह्यो के वोट देवण रा पात्र सगळा लोगां रा नाम वोटर लिस्टां मांय शामिल करण अर अपात्र लोगां रा नाम इण ऊँ बाहर राखण रा मकसद ऊँ विशेष गहन पुनरीक्षण-एसआईआर कार्यक्रम चलायी ज्यो हों मुख्य निर्वाचन आयुक्त कह्यो के 12 राज्यां मांय एसआईआर रो काम चाल रह्यो है अर आं मांय ऊँ 11 राज्य वोटर लिस्टां छाप दीनीं हैं

000

जैसलमेर जिला री धार्मिक ठौड़ रामदेवरा मांय आज राज्य स्तर रो पशु मेळो सरू व्ह्यो जिला प्रशासन अर पशुपालन विभाग कानी ऊँ मिल र राख्यो जा रह्यो ओ मेळो ध्वजा चढावण सागे सरू व्ह्यो मेळा मांय ढांढा-ढोरां रा स्वास्थ्य री जांच करण अर टीका लगावण रा खास शिविर लगाया जा रह्या हैं ई सागे ई गांवांई संस्कृति ने बधावो देवण सारू सांस्कृतिक कार्यक्रम ई राख्या जा रह्या हैं

000

बालोतरा मांय 15 मार्च ऊँ मल्लीनाथ पशु मेळो भरेलां इण री तैयारियां रो जायजो लेवण सारू जिला कलेक्टर सुशील कुमार यादव अहलकारां सागे मीटिंग कीनीं मीटिंग मांय श्री यादव बतायो के दुकानां री नीलामी अर खर्च प्रबन्धन सारू उपखंड अधिकारी री सदरत मांय समिति बणायी ज्यी हैं वे कह्यो के अहलकारां ने जरूरी तैयारियां टेमसर पूरी करण रा हुकम दिया ज्यी हैं

000

सवाईमाधोपुर मांय भ्रष्टाचार निरोधक ब्यूरो खंड विकास अधिकारी जगदीश प्रसाद मीणा ने एक लाख रुपया री घूस लेता थकां पकड़ लीनीं मीणा जिला परियोजना प्रबंधक रो काम ई देख रह्या हां ब्यूरो रे मुजब, आरोपित अहलकार मीणा शिकायत करण वाळा अर वां रा साथियां ने नौकरी ऊँ नी हटावण अर टी.ए. रा बिल पास करण री एवज मांय आ रकम मांगी हीं

000

प्रदेश मांय मौसम मांय बदलाव अर तापमान मांय उतार-चढाव बीचे छांटो-छिड़को व्ह्यो मौसम विभाग रे मुजब जयपुर संभाग मांय चौमूं, वनस्थली अर दौसा जिला रा लालसोट अर खेड़ली मांय छुटपुट बरसात व्हीं दूजी कानी बाड़मेर मांय पारो 35 डिग्री सेल्सियस ताई पूग ग्यो चित्तौडगढ, जैसलमेर अर बीकानेर मांय ई अधिकतम तापमान 33 डिग्री सेल्सियस ने पार कर ग्यो मौसम केन्द्र जयपुर रा निदेशक

राधेश्याम शर्मा बतायो के काल ऊँ कठे-कठे तापमान मांय 2 ऊँ 4 डिग्री सेल्सियस री बधोतरी रा आसार हैं

000

खैरथल-तिजारा ज़िला रा भिवाड़ी मांय कारखानां री जांच सारू खास अभियान चलायो जा रह्यो हैं जिला मांय लारला एक सप्ताह रे दौरान अढाई हजार ऊँ बत्ता कारखानां री जांच करी ज्यीं रीको, प्रदूषण नियंत्रण मंडल अर अग्निशमन विभाग समेत न्यारा-न्यारा महकमां री ओर ऊँ एक हजार 58 फैक्ट्रियां ने नियम नी मानण रा आरोप मांय नोटिस दिया ज्या हैं

000

बाल विवाह मुक्त भारत अभियान रा तैत जोधपुर मांय ज़िला बाल संरक्षण इकाई री ओर ऊँ रथ यात्रा रवाना करी ज्यीं रथ यात्रा गांवां मांय जा र टाबर-टाबरियां रा ब्याह नी करण रो संदेश देवेलां आं रथां ऊँ ऑडियो संदेश, पोस्टर बांटण, जनता सागे बातचीत अर शपथ कार्यक्रममां रे ज़रिये जनता ने ई सामाजिक बुराई ने रोकण सारू जाणकारी दी जावेलां

000